

Mbate kí Jaki ndàngì

Ta-je kí dɔ mbete-ti kí Jaki ndàngì

Jaki ndàngì mbete kin kadi ra kì njéndó-é-je kadi 'gə-né né kí tɔjì kadmeɛ kí togrɔ-ti rəm, bá kadi ulə dingəm meɛ-dé-ti kadi 'ra kullə kadmeɛ lə-dé rəm tɔ. Jaki 1:1 tɔjì kí dow-je kí dɔsɔy kí Jaki ndàngì mbete kin adi-dé lé, 'to jipi-je kí d'adi meɛ-dé Jeju Kristi, kí d'isi dɔnangì Israyel-ti al. Ngà to mbete kí à ra kì dow-je lay kí d'adi meɛ-dé Jeju tɔ. Jaki tɔjì rɔ-é kí njèrakullə lə Lubə kì 'lə 'Babe Jeju Kristi (Jak 1:1). Dan dow-je-ti kí so kí ri-dé lə Jaki meɛ Kunmindi-ti kí Sigi kinlé, à to ɛ kí 'panè to kí káre dan ngankɔ Jeju-je-ti kin bá ndàngì mbete kinlé (Mat 13:55; Mar 6:3). Pol pa ta liə meɛ mbete-ti kí adi Galati-je 1:19 tɔ. Go tɔsi ndəl kində lo tɛɛ-ti lə Jeju bəy bá Jaki lé adi meɛ kí Kristi to dow kí Lubə un mindi-é kɔ kadi-é ree lé (1Kɔ 15:7). Go-ti, Jaki təl to njèkɔrnɔ njékəwnɔ-je kí Jorijaləm. Mbete kullə-je lə njékɔwkułə-je 15 pa ta lə kullə liə. Ɛ tum gin mbete liə kí ta kí sobi dɔ nɔmeɛ dow kí à kadi njèkadmeɛ tɔgì meɛ kadmeɛ-ti. Bá go-ti, ɛ pa ta kí sobi dɔ panjiyə-je kí gay-gay meɛ kadmeɛ-ti rəm, bá pa ta kí sobi dɔ ra kullə kì ta lə Lubə rəm, ra kì njéndoo-je rəm, bá tɔjì kullə

ra lə kadmɛɛ rəm, pa kí dɔ koo-ti kí kadi dow oo go ta-é dɔ ta-ti kí ɛ pa rəm, bá pa ta kɔw-ti kí kadi dow ɔw kì gosi lə Lubə rəm tɔ. Ɛ ndɔr mbi njénékingə-je, ə ulə dingəm mɛɛ njékadmɛɛ-je-ti kí d'isi 'ngəbi təl lə 'Babe, bá mbusi nja-dé kadi 'ra né kí tɔgrɔ-ti rəm, kadi 'pa ta kì Lubə rəm, bá kadi 'təl kì dɛ kí 'ndəm kadi d'ingə kaji rəm tɔ.

Tɔji rɔ kì Lapiya kí ra

¹ †Mɔ Jaki kí ngonnjèkullə lə Lubə, kì ngonnjèkullə lə 'Babe Jezu Kristi, bá m'ndàngi mbete kin m'adi-si sɔi gin koji kí dɔgi gidi-é* joo kí 'sanəi-nɔ dɔ bɛ-je-ti kí rangi ə m'ra-si lapiya.

Kadmɛɛ kì gosi

² Ngankɔ-m-je kí njékadmɛɛ, né-je kí gay-gay kí tɛɛ dɔ-si-ti nɔ mɛɛ-si kɔɔ koo kinlé, kadi ooi kì né rɔnəl kí ɔr njuti. ³ Kɔɔ sɔi 'gəi kí nɔ kadmɛɛ lə-si kɔɔ koo kinlé, à koji kuwə rɔ ngɔ. ⁴ Ngà kadi kuwə rɔ ngɔ lə-si ɔ lo kɔ-é-ti gərərə, kɔɔ kadi 'toi dow-je kí asi gaki rəm, mɛɛ-si idi njiki-njiki, ə kadi 'toi dow-je kí né madi nal-si al rəm tɔ. ⁵ Kinə dow káre dan-si-ti nal gosi rəmə, kadi dɔji Lubə ə à kadi-é; kɔɔ Lubə tɔ njèkadì né dow-je lay kare kì ndinoji. ⁶ Ngà kadi dowbé dɔji kì kadmɛɛ rəm, bá kadi-é tadi ta dɔ-ti al rəm tɔ. Kɔɔtalə dow kí tadi ta dɔ né-ti lé titi-nɔ kì pungum man babo kí yəl ɔsi-é yó-je kì nɛ-je kin bè. ⁷ Kadi dow

† **1:1** 1:1 Mat 13:55; Mar 6:3; Knj 15:13; Gal 1:19 * **1:1** 1:1 Dow-je kí Jaki ɓa-dé gin koji kí dɔgi gidi-é joo kinlé, to gin koji Israyel-je kí məsi-ti kí d'adi mɛɛ-dé Jezu. Ngà ta kinlé à sɔbi dɔ dow-je lay kí 'to jipi-je al kí d'adi mɛɛ-dé jɛju tɔ.

kí titi-na bè kinlé, gə kí à kingə né ji 'Babe-ti al.
 8 To dow kí mee-é ra joo rəm, kojra-je liə lay ya
 ɛ ɔ do-ti al.†

Ta kí sobi do njendoo de kɪ njénékingə

9 Kadi ngonkɔ-ji kí njèkadmeɛ kí to njendoo ra
 rɔnəl kɔɔ do-é tò ki taá. 10 Ə njénékingə rəmə,
 kadi-é ra rɔnəl kɔɔ do-é tò ki nangi tɔ. Kɔɔ ɛ à
 goto titi kí puti wale ur-né kin bè. 11 Loki kàdɪ
 ubə bá ɔsi n̄a lé, wale ndole ə puti-é ur adi kurə-
 é kí kete goto. Bè ya tɔ é njénékingə à goto-né ta
 kullə-je-ti liə.

Ta kí sobi do n̄ameɛ koo rəm, néng rəm

12 Dow kí ɔ gərərə mee néna-ti lé, to
 njénékumə; kɔɔ go kɔ gərərə-ti liə lé ɛ à kingə
 nédoji kí sobi do kiskəm kí 'Babe un mindi-é kɔɔ
 kadi dow-je kí njéndigi-é. 13 Kinə néna tee do
 dow-ti rəmə kadi-é panè «to Lubə bá n̄a n'è» al,
 kɔɔ Lubə lé né kí maji al à n̄a-é al rəm, bá ɛ ya
 kɪ do-é kàrè n̄a dow al rəm tɔ. 14 Ngà n̄a-n̄a kí
 né n̄a-é lé to kəmnda né kí tò mee-é-ti ya ədi-é ə
 ndr-é ki ta-ti. 15 Go-ti, loki kəmnda ra be mee-
 é-ti rəmə oji majal, ə loki majal ɔw ki kete-kete
 lé oji koy tɔ.

16 Ngankɔ-m-je kí njèkadmeɛ kí m'ində-si dan
 kəm-m-ti, ədi rɔ-si al: 17 Kadkare lay kí maji n̄a
 kɪ kí maji ɔr njuti lé, to né-je kí taá kí ɪ rɔ Lubə-ti
 kí to Bɔbi né-je kí ndógi. Lubə lé ɛ mbəl rɔ-é tò
 gay al rəm, bá ndil né kí njembəl rɔ-é goto rɔ-é-ti
 rəm tɔ.

† 1:8 1:8 1Ja 5:14-15; Mat 7:7-11; 15:22-28; Luk 18:1-8

¹⁸ Lubə ya oji-ji kì meëndigi liə kì takul ta liə kí to ta kí tɔgrɔ-ti, kɔ kadi j'toi titi dɔdər né-je lay kí ɛ ra-dé kin bè.

Koo ta lə Lubə ə təl rɔ go-ti

¹⁹ Ngankɔ-m-je kí njékadmeɛ kí m'ində-si dan kəm-m-ti, né kí kadi 'gəi ɔn: Kadi n̄a-n̄a ya i kalangi oo ta, ngà kadi i kalangi pa ta al rəm, bá kadi i kalangi ra wɔngi al rəm tɔ. ²⁰ Kɔ wɔngi lə dow à ra né kí njururu lə Lubə al. ²¹ Gin-é kin bá kadi 'mbati-né né-je lay kí tò n̄ɛ kì né-je lay kí to kullə meëndul kí n̄ay meɛ-si-ti, rəmə ta kí 'dubi meɛ-si-ti kí to ta kí à kasi kaji ndil-si kinlé bá kadi 'ndigi dɔ-ti kì dɔ kí səl ləm-ləm. ²² Ooi ta kì koo par al, ngà ooi ta ə 'təli rɔ-si go-ti bane, bi ədi rɔ-si kì ta-je kí kuy kì nati al. ²³ Kɔ dow kí oo ta bá təl rɔ-é go-ti al lé, titi-n̄a kì dow kí oo ta kəm-é sɔɔbɔ-ti, ²⁴ bá ɔti ɔw rəmə tajinati nè ya meɛ-é oy dɔ ta kəm-é-ti lé səl kin bè. ²⁵ Ngà dow kí ndər gin ndukun kí maji kí njətaa-ji kilə-ji taá kin ə təl rɔ-é go-ti bá a dɔ-ti njangi, bi adi meɛ-é oy dɔ-ti al, ngà ɛ ra-né kullə kì rɔ tungə-é rəmə, dowbé kinlé to njənəkumə meɛ kullə ra-é-ti. ²⁶ Kinə dow ba rɔ-é njèpole né bá ngəm ndɔ-é al lé, ɛ ədi rɔ-é kì kədi, népole lə dowbé kinlé to né kí kɔgi kare. ²⁷ Yən, népole kí Lubə kí Bɔbi-ji oo adi to népole kí aa njay kí né kí maji al goto-ti ta kəm-é-ti lé, to koo go ngan al-je kì njəngɔwkoy-je dan nékəmtondoo-je-ti lə-dé, ə kitə rɔ ngərəngi kàdì né-je-ti kí dɔnangi-ti kí tò n̄ɛ.

2

Ta kí sɔbi dɔ kɔrkəm-nɔ

¹ Ngankɔ-m-je kí njékadmɛɛ, kadmɛɛ 'Babe lə-ji Jeju Kristi kí njèriɓa lé, ori nati kì kɔrkəm-nɔ al. ² Kinə dow madi ulə 'ningó lɔr ji-é-ti kì kubi-je kí maji-maji rɔ-é-ti ɔw-né lo kəwnɔ-ti lə-si je bè ə njəndoo madi ulə kubi-je kí ndisi rɔ-é-ti ɔw-né kəykəwnɔ-ti lé tɔ, ³ rəmə kəm-si tò sikim dɔ dow-ti kí ulə kubi-je kí maji-maji rɔ-é-ti lé adi idəi-é 'painè: «I, 'isi nè, lo-ti kí maji kin.» Ngà njəndoo lé bá idəi-é 'painè: «I, 'a taá tin» al rəmə «'isi nangi lo kungi nja-m-ti tin.» ⁴ Loki səi 'rai né kí bè kin dan-si-ti lé to kɔr kəm-nɔ ɓan al wa? Ə səi 'təli njékɔr gangi né-je kì tagir-je kí maji al kí mɛɛ-si-ti ɓan al wa?

⁵ Ooi, ngankɔ-m-je kí m'ində-si dan kəm-m-ti: 'Gəi toki Lubə mbəti dow-je kí dow-je kí dɔnangi-ti nè d'oo-dé kì njəndoo-je lé, kadi 'təl njénékingə-je kí mɛɛ kadmɛɛ-ti rəm, kadi kɔɓe kí ɛ un mindi-é kɔɔ kadi njéndigi-é-je lé, təl nédɔji lə-dé rəm ya al wa? ⁶ Ngà səi ngà bá 'nədi njəndoo-je! Njénékingə-je ya bá 'to njékadi-si kɔ-je kì njékɔw sə-si nɔ njégangta-je-ti lé al wa? ⁷ Dɛ ya bá 'to njəsɔki ri kí maji kí toki kində dɔ-si-ti lé al wa?

⁸ Tɔgrɔ-ti ya, kinə 'təli rɔ-si go ndukun-ti kí ɔ madi-é-je lay kí to ndukun lə Lubə kí to ngar lə-ji, kí 'ndangi mɛɛ mbete-ti kí aa njay 'panè: «'A ndigi dow madi-i titi-nɔ kì rɔ-i bè tɔ†» kin rəmə to né kí maji. ⁹ Ngà kinə səi ɔri kəm dow-je rəmə səi 'rai majal ə ndukun gangta dɔ-si-ti kɔɔ səi ali

† 2:8 2:8 Luk 10:27

dɔ ta. ¹⁰ Kdɔtalə kinə dow təl rɔ-é go ndukun-ti bikti lay ya bá ɛ al dɔ ndukun káre rəmə, dowbé al dɔ ndukun-je lay ya. ¹¹ Kdɔ dow kí njèpanè: «'A ra kaya al» lé, ya panè: «'A təl dow al» tɔ. Adì kinə i 'ra kaya al kàrè bá kinə i 'təl dow rəmə, i 'al dɔ ndukun bikti lay. ¹² 'Pai ta rəm, 'rai né rəm, kəm dow-je kí d'a gangta dɔ-dé-ti kì ndukun kí njètaa dow-je kilə-dé taá kin bane. ¹³ Kdɔ, dow kí njèkoo kəmtondoo lə madi-é al lé, ta kí gangi kí dɔ-é-ti kàrè koo kəmtondoo à goto-ti tɔ. Ngà koo kəmtondoo bá dow à dum-né dɔ ta kí gangi.

Kadmɛɛ kɪ kullə kadmɛɛ

¹⁴ Ngankɔ-m-je kí njékadmɛɛ, kadi dow panè: «M'ow kì kadmɛɛ», ya ngà ɛ ra né kí tɔji kadmɛɛ lé al lé, se maji-é to ri wa? Se kadmɛɛ kinlé à kaji-é ya ban wa? ¹⁵ Kinə ngankɔ-si-je əse kɔnan-si-je madi d'ow kuti-dé dum əse nékuso-dé kì ndɔ-je lay goto ¹⁶ ya rəmə dow káre dan-si-ti idə-dé panè: «Ɔwi kì lapiya, adi rɔ-si tungə jùrùrù ə adi mɛɛ-si ndan!» Loki səi 'pai bè ya bi adi-dé né kí d'a ra-né kì rɔ-dé al lé, sé maji-é to ri wa? ¹⁷ Kí sobi dɔ kadmɛɛ kàrè tò bè ya tɔ. Kadmɛɛ lé, kinə kullə-é goto rəmə, to kadmɛɛ kí oy suj.

¹⁸ Ngà dow madi à panè: «I 'ow kì kadmɛɛ, ngà mə rəmə m'ow kì kullə kadmɛɛ», ən é «ɔji-m kadmɛɛ lə-i kí kullə-é goto lé adi m'oo ə mə m'a kɔji-i kullə kadmɛɛ lə-m kadi oo-né kadmɛɛ lə-m tɔ.» ¹⁹ I 'adi mɛɛ-i kí Lubə ra káre-rè, 'lə-i to tó-é ya. Ndil-je kí maji al kàrè, d'adi mɛɛ-dé kí Lubə ra káre-rè tɔ, ə 'dadi ngin-ngin. ²⁰ Mbó dow, se i ndigi gə né kí tɔji kí kadmɛɛ kí kullə-é goto to kadmɛɛ kí mɛɛ wəy kare lé wa? ²¹ Ka-ji

Abrakam ilə ngon-é Isaki logugi né-ti kɔɔ kadi Lubə kadkare-ti, adi to takul kullə ra-é-je bá ta ɔr-né dɔ-é-ti ya al wa? ²² I gə maji kí kadmɛɛ liə ɔw nati kì kullə ra-é-je ə kì takul kullə ra kadmɛɛ bá kadmɛɛ liə maji ɔr-né njuti. ²³ Beba ta kí mbete kí aa njay pa lé né-é ra né. Mbete kí aa njay lé panè: «Abrakam adi mɛɛ-é Lubə, beba Lubə ɔr-né ta dɔ-é-ti ə ba-é-né nam-é.» ²⁴ Səi 'gəi kí to kullə ra dow bá ta ɔr-né dɔ-é-ti bi kì takul kadmɛɛ liə ya par al. ²⁵ Bè ya tɔ é Rakabi* kí to dené kí njəkaya ya, uwə njétən lo-je kí 'to Israyel-je kì rɔ-é-ti, ə adi-dé 'təl kì rəbi kí rangi, adi to takul kullə ra-é bá Lubə ɔr-né ta dɔ-é-ti. ²⁶ Titi kí dow kí koo goto mɛɛ-é-ti to-né dow kí oy kinlé, gangi-é kin ya tɔ é kadmɛɛ kí kullə-é goto to-né kadmɛɛ kí oy tɔ.

3

Ta kí dɔ ndɔ dow-ti

Mat 12:33-37

¹ Ngankɔ-m-je kí njəkadmɛɛ, kadi səi njéndó dow-je né 'nəi al! Kɔɔ səi 'gəi maji kí je njéndó dow-je né-je lé ta kí gangi kí dɔ-ji-ti à ngə nɔ. ² Jəi lay ya j'rai né kí maji al kì kəm rəbi-je kí gay-gay. Kinə dow ra majal mɛɛ ta pa-é-ti al rəmə, dowbé to dow kí maji ɔr njuti ə asi kuwə rɔ-é lay gin tógi-é-ti. ³ Loki j'uləi jim ta sində-je-ti kadi 'təl rɔ-dé go-ji-ti lé, j'owi kì tógi dɔ rɔ-dé-ti lay. ⁴ Ooi ta kí dɔ bato-je-ti tɔ: Bato-je lé to né-je kí boy nɔ ya, ngə loki yəl kí ulə kì tógi-é osi-dé kì kete-kete

* 2:25 2:25 Joj 2:1-21

lé, ngon gow-é kí nde bè ya njèkuwə-é ow-né sə-dé lo-ti kí mee-é ndigi. ⁵ Bè ya to, ndo dow to ngon ro kí nde bè, ya e pa ta-je kí al do-é do-é osi-né gaji ro-é. Ooi bè! Ngon kopər kí nde bè ya asi kò mee mbo lay! ⁶ Ndo dow lé titi-na kì kopər bè to. E bá to lo kí né ra kí njururu al tò-ti; ndo dow lé to ngon ro-ji kí tò dan ngan ro-ji-je-ti. E ya to njèndəm ro-ji lay kí né kí maji al, bá un pər kí tò sartagangi do-é-ti ree ində-né kisi kì do taá lə-ji! ⁷ Dow asi təl da-je kí gay-gay lay, kì yəl-je, kì né-je kí njékagi nangi, kì né-je kí mani gin tógi-é-ti, ə təl-dé gin tógi-é-ti ya to. ⁸ Ngà ndo dow lé, dow kí asi kuwə-é gin tógi-é-ti goto. To né kí maji al kí dow à kasi kuwə ta-é al, ə kəngi né kí à təl dow rusi nji-nji. ⁹ E ya j'osi-né gaji Bəbi-ji kí to 'Babe rəm, bá j'indəi-né ndol do dow-je-ti kí Lubə ra-dé adi 'titi-na siə rəm to. ¹⁰ Ta-ji kí káre-rè kin ya tərndi tɛɛ-ti rəm, bá ndol tɛɛ-ti rəm. Ngankɔ-m-je kí njékadmee, to né kí à tò bè al. ¹¹ Kəm kənɛnɛ kí káre-rè lé, man kí sol kì man kí ati à tɛɛ-ti wa? ¹² Ngankɔ-m-je kí njékadmee, kote à kandi olibiye wa? Əse nduu à kandi kote wa? Kəm kənɛnɛ kí káre-rè lé man-é à do kati rəm, à sol rəm al.

Gosi kí i dora-ti

¹³ Ná dan-si-ti bá to njègosi kì njènégə wa? Kadi-é toji kullə ra-é mee panjiyə-ti kí maji kí toji kullə ra dow kí njèsol do-é kì njègosi. ¹⁴ Ngà kinə kim-na kì jangi rusi mee-si nji-nji rəmə, osi gaji ro-si al rəm, bá ədi ta osi-né ta kí togro-ti ngerəngi al rəm to. ¹⁵ Gosi kí bè kinlé i dora-ti

al, ngà to gosi kí dɔnangi-ti nè, to gosi læ dow, kì gosi læ ndil-je kí maji al. ¹⁶ Kdo lo kí jangi kì kim-nā tò-ti lé, né-je kí tulə natì kì majal-je kí gay-gay tò-ti tɔ. ¹⁷ Ngà gosi kí ì dɔrā-ti to gosi kí aa njay ya kete, go-ti to lapiya, to sɔl lɔm-lɔm, to kuwə noji, to koo kəmtondoo kí nā, to kullə ra-je kí maji-maji ə kɔr kəm-nā goto-ti rəm, bá kədkəm-nā goto-ti rəm tɔ. ¹⁸ Dow-je kí njékulə dow-je noji natì lé, 'to njésangi lapiya lo kisi-dé-je-ti ə kandi-é to né ra kí njururu.

4

Rɔ kì bo né-je kí maji al

1Pi 5:5-9

¹ Ta-je kì kɔl-nā-je kí tò dan-si-ti lé ì rá wa? To bo né-je kí maji al kí mɛɛ-si-ti ya bá ɔsi-si bɔy-bɔy buki-si dɔ-nā-ti tin al wa? ² Səi 'rai kəmnda né ə ingəi al; rəmə 'toi njétɔl dow-je kì njéra-nā jangi-je; né kí ingəi mɛɛ-é-ti goto. Səi 'toi njéra-nā ta-je kì njékɔl-nā-je. Né kí 'ndigi lé, səi ingəi al, kdo 'gəi dəji né Lubə al. ³ 'Dəji né ə ingəi al, kdo 'dəji kì tagir kí maji al, 'dəji kdo tində sane kɔgi dɔ bo né-je-ti kí maji al kí mɛɛ-si-ti. ⁴ Səi njérakaya-je kan! Səi 'gəi kí ra kəmnda né-je kí dɔnangi-ti lé, to kɔsi ta kì Lubə ya al wa? Adì dow kí ra kəmnda né-je kí dɔnangi-ti nè lé to njèba læ Lubə. ⁵ Ta kí mbete kí aa njay pa lé, səi adi to ta kí kare wa? Mbete kí aa njay panè: Ndil* kí Lubə adi-é isi mɛɛ-ji-ti lé jangi ra-é dɔ-ti.

* **4:5** 4:5 Ndilkí ta-é tò nè kinlé dow-je kí 'ná-je 'panè to Ndil kí aa njayə dɛ kí dan-ti-je 'panè to ndil dow.

⁶ Ngà ramaji lə Lubə lé al dɔ lo; kɔɔ mbete kí aa njay panè: Lubə ɔsi ta njékində kàdì-dé-je, ngà ɛ ramaji kì njésɔl dɔ-dé-je. ⁷ Ən é uləi dɔ-si gin tógi-ti lə Lubə; ɔi gərərə nɔ́ Sú-ti ə à kɔy-si kɔ say nɔ́. ⁸ 'Reei ngɔsi kɔ rɔ Lubə-ti ə à ree ngɔsi kɔ rɔ-si-ti tɔ. Səi njéramajal-je, 'tɔri ji-si né kí maji al-ti; səi kí mɛɛ-si ra joo, adi mɛɛ-si aa njay. ⁹ Kadì 'gəi kí 'toi dangi-ti-je, 'ndingəi ndoo, 'nɔi, adi kogi lə-si təl nɔ́ ə adi rɔnəl lə-si təl mɛɛkɔ́. ¹⁰ 'Soli dɔ-si nɔ́ 'Babe-ti ə à kitə dɔ-si taá.

Ta kí sɔbi dɔ gangta dɔ-nɔ-ti

¹¹ Ngankɔ-m-je kí njékadmeɛ, 'pai ta kí maji al dɔ-nɔ-ti al. Dow kí pa ta kí maji al dɔ ngonkɔ-é-ti əse gangta dɔ-é-ti lé, ɛ pa ta kí maji al dɔ ndukun-ti lə Lubə rəm, b́a gangta dɔ ndukun-ti lé rəm tɔ. Ngà kinə i 'to njègangta dɔ ndukun-ti rəmə, i 'to njègangta b́i 'to njètəl rɔ-i go ndukun-ti al. ¹² Kɔɔ Lubə ya kì kár-é é to njèkadì ndukun rəm, b́a to njègangta rəm; ɛ ya asi kaji dow rəm, asi təl dow rəm tɔ. Ngà i ə 'to ná b́a 'gangta dɔ dow madi-i-ti wa?

Ta kí sɔbi dɔ kində kàdì

¹³ Ooi maji! Səi kí isi 'painè: 'Bone əse bore ə j'a kɔw bebo-ti kí bè kin, j'a ra b́al káre, j'a ra gati ə j'a kingə là. ¹⁴ Səi 'gəi né kí à tɛɛ dɔ-si-ti ndɔ-ti kí bore al! Kɔɔ səi lé 'titi-nɔ́ kì mum kí usi sɛ bè ya ə sane kin bè. ¹⁵ Ngà ta kí lé a pai ən: Kinə 'Babe ndigi rəmə, j'a kisi kì dɔ-ji taá ə j'a ra né kí bè əse né kí bè kin. ¹⁶ Ngà kí ngɔsnè-ti kinlé, səi isi ɔsi gaji rɔ-si kì ta-je kí al dɔ-si. Ko

kosi gaji rɔ kí bè kinlé maji al. ¹⁷ Kinə dow gə ra maji ya fá ra al lé, dowbé kin ra majal.

5

Ta kí sobi do njénékingə-je

¹ Səi njénékingə-je, ooi maji! 'Nɔi, 'tuməi rusi-rusi, kdɔtalə tuji-je kí à ree do-si-ti! ² †Nékingə-je lə-si ndum luti ə nɔ-je d'ɔ̄ kubi-je lə-si lay. ³ Lɔr-je k̄i là-je lə-si nɔ; ə nɔ-é kinlé à kilə ta do-si-ti, ə à k̄ɔ̄ daji rɔ-si titi-n̄a k̄i pər bè. Səi isi mbɔi né-je lə-si indəi ngangəm mee ndo-je-ti kí doɔbɔy-ti bəy al fan! ⁴ Ooi bè! Səi 'mbati kugəi nédoji njérakullə mee ndɔr-je-ti lə-si adi 'nɔ̄ ə ndi nɔ-dé ɔw sar usi mbi 'Babe-ti kí njəkosi njérɔ-je. ⁵ Səi isi dan maji-ti bagja donangi-ti nè ə in̄əi rɔ-si yaki 'rai né-je kí donangi-ti nè. Səi usoi né əi-né mbul-mbul toki d̄a-je kí d'ɔw k̄i tol-dé kin bè. ⁶ Njèra né kí njururu ya səi 'gangi ta do-é-ti ə 'toli-é do-ti. Ǝ ijə-si rɔ al.

Kuwə rɔ ngə mee néng-je-ti

⁷ Beba ngankɔ-m-je kí njékadmee, iləi mee-si do madi-é-ti sar ndo təl 'Babe-ti. Ooi, njëndɔr lé, ilə mee-é do madi-é-ti sar kadi ingə-né man ndi kí dɔs̄ay k̄i s̄ɔy man ndi ngəbi-né kandi né kí maji kí nangi à kadi-é. ⁸ Səi ya kàrè, iləi mee-si do madi-é-ti, uwəi mee-si nḡa, kdɔ ndo ree lə 'Babe n̄ay ngosi. ⁹ Ngankɔ-m-je kí njékadmee, 'yuni ta do-n̄a-ti al, nè ta kí gangi à kusi do-si-ti. Ooi, Njègangta ɔ̄ tarəbi-ti ngá.

† 5:2 5:2 Mat 6:19

¹⁰ Ngankɔ-m-je kí njékadmee, njépata-je kí ta Lubə-ti kí ndɔki 'pa ta kɪ ri 'Babe lé, d'ingə kɔ rəm, d'ilə mee-dé dɔ madi-é pɔ rəm ɛn ɛ adi 'to néndaji lə-si. ¹¹ Ooi bè! Dow-je kí d'ɔ dɔ nja-dé-ti njángi lé bá j'painè 'to njénékumə-je. Səi ooi poyta kí sobi dɔ kɔ dɔ nja-ti njángi lə Jobi rəm, bá né kí 'Babe ra siə ta sɔy-é-ti kàrè ooi rəm tɔ. Kdɔ 'Babe lé to njékoo kəmtondoo rəm, bá ta ɔ mee-é kdɔ dow-je rəm tɔ.

Ta kí dɔ kubi rɔ-ti

¹² †Ngankɔ-m-je kí njékadmee, kete nɔ né-je-ti lay lé, ubi rɔ-si kɪ dɔrɔ al rəm, ubi rɔ-si kɪ dɔnangi al rəm, bá ubi rɔ-si kɪ né madi kí rangi al rəm. Ngà kinə ta lə-si to oiyo rəmə, ɔi dɔ oiyo-ti ɔ kinə ta lə-si to ɔ-ɔ rəmə, ɔi dɔ ɔ-ɔ-ti; bè kdɔ kadi usi mee ta kí gangi-ti al.

Pa ta kɪ Lubə kdɔ njémɔy-je

¹³ Kinə dow madi dan-si-ti isi dan kɔ-ti rəmə, kadi-é pa ta kɪ Lubə. Kinə dow madi dan-si-ti isi dan rɔnəl-ti rəmə, kadi-é usi patóy-je. ¹⁴ †Ba kinə dow madi dan-si-ti mɔy ra-é rəmə, kadi-é ba 'ngatógi-je lə njékəwnɔ-je kadi 'pa ta kɪ Lubə kdɔ ta liə d'ur-né ubi dɔ-é-ti kɪ ri 'Babe. ¹⁵ Ta kí pa kɪ Lubə kɪ kadmee lé à kadi lapiya njémɔy ɔ 'Babe à kadi-é ubə nangi i taá; ɔ kinə ɛ ra majal-je nɔɔ rəmə, à toki kinə go-é kɔgi kadi-é.

¹⁶ Ɔn ɛ 'pai ta rəsi dɔ majal-je-ti lə-si adi-nɔ ɔ 'pai ta kɪ Lubə kdɔ ta lə-nɔ, kdɔ kadi ingəi lapiya. Ta kí njèra né kí njururu pa kɪ Lubə ɔ ɔ dɔ-ti

njáŋgi lé, ɔw k̀ì tógi ɲ̄. ¹⁷ Eli kí to dow madi-
 ji ya ndɔki pa ta k̀ì Lubə ɔ do-ti njáŋgi kadi ndi
 ədi al ɔ ndi ədi dɔnangi-ti al ya bal mutə k̀ì ɲ̄y
 meke. ¹⁸ Bəy bá təl pa ta k̀ì Lubə gogi rəmə, ndi
 ədi adi né-je kí dɔnangi-ti andi.

¹⁹ Ngankɔ-m-je kí njékadmɛɛ, kinə dow madi
 dan-si-ti ndəm, adi ɔ say k̀ì ta kí togro-ti bá dow
 kí rangi təl ree siə ²⁰ †rəmə, kadi 'gəi maji kí
 dow kí njètəl k̀ì njèramajal do rəbi ndəm-ti lé, to
 njékaji-é ta yo-ti. Ə né kí ɛ ra kinlé to kəm rəbi
 kuti* do majal-je ɲ̄.

† **5:20** 5:20 1Pi 4:8 * **5:20** 5:20 Kuti do majal-je kí ta-é tò nè
 kinlé to ta kí sobi do kuti do majal-je kadi dow oo al al, ngà sobi
 kiŋə go majal-je kogi (Gos 10:12; Pa 32:1; 1Pi 4:8).

Ta lə Lubə Kunmindí kí Sigi
Mango: Ta lə Lubə Kunmindí kí Sigi (New
Testament)

copyright © 2020 Wycliffe Bible Translators, Inc.

Language: (Mango)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 21 Feb 2024 from source
files dated 29 Jan 2022

a2451d3b-54b4-50ec-847f-e964bc48641a